

## In occasiun dals 25 onns Posta Ladina, 1997 – 2021

### Il svilup da la pressa ladina

La pressa ladina ha üna lunga istorgia. Ella cumainza al principi dal 18avel tschientiner. Davo il 1700 daiva nempe dürant divers ons la "Gazetta ordinaria da Scuol". Davo quista prüma gazetta illa regiun haja dat pür darcheu i'l 19avel tschientiner gazettas edidas in Engiadina. Dasper divers progets da cuorta dürada s'ha etabli dal 1882 il «Fögl d'Engiadina» ed a partir dals ons 1920 la «Gazetta ladina». L'on 1941 sun quistas duos gazettas fusiunadas al «Fögl ladin», la gazetta da mia infanzia e giuventüna. La redactura Domenica Messmer e davo Jon Mantschal am sun amo in buna memoria. Dal 1997 es il "Fögl ladin" gnü integrà illa gazetta rumantscha surregiunala «La Quotidiana».

Sün üna istorgia fingià bundant tschientenara pudaiva fingià guardar inavo da quel temp l'«Engadiner Post», cumparüda la prüma jada il 1894. Parallel al svilup da la gazetta rumantscha surregiunala es l'«Engadiner Post» lura dvantada il 1997 bilingua, profitand eir ella da l'«Agentura da Novitads Rumantscha» (ANR), fundada il 1996.

La «Posta Ladina» es ün uffant ed ün spejel dal svilup da la pressa rumantscha e dal movimaint rumantsch in general: Nomnadamaing da l'act da balantscha tanter las ragischs regiunalas ed il bsögn da concentrar las forzas sün livel surregiunal.

Il fat cha la «Posta Ladina» po festivar fingià seis 25avel anniversari – quai voul dir cleramaing daplü co bleras da las gazettas ladinas da piunier – merita stima e grond respet!

Id es ün fat cha grazcha a la gazetta bilingua i'l inteschess ladin vegnan cunfruntadas lecturas e lectuors da lingua tudais-cha, abonnents da l'"Engadiner Post", automaticamaing eir culla lingua rumantscha. Quai es sgüra üna plüvalur pel rumantsch. Da l'otra vart sun tscherts temas surtuot chi pertoccan l'Engiadin'Ota e chi gnivan tematisats plü bod eir i'l "Fögl Ladin", scrits be plü per tudais-ch. Suot il strich es il guadogn pel pled rumantsch e la convivenza linguistica i'l inteschess ladin però plü grond co la perdita. Il fat cha la "Engadiner Post / Posta ladina" ha bler daplässas abunetas ed abunents i'l inteschess ladin co la "Quotidiana" demuossa cha'ls interess regiunals domineschan sur ils interess cumünaivels da l'intera Rumantschia.

L'agentura da novitats ANR ha avant duos ons pudü gnir transfuormada illa FMR, la Fundaziun da las medias rumantschas. La FMR ha ün nouv timun operativ fich dinamic ed artschaiva daspö duos ons considerabelmaing daplü mezs finanzials davart da la confederaziun e dal chantun. Grazcha al permiss cha l'Uffizi federal da communicaziun ha dat a Radio e televisiun rumantscha (RTR), po RTR collavurar strettamaing cun la FMR. Uschè esa pussibel da derasar eir prodots schurnalistics da RTR sur la FMR e natüralmaing eir viceversa. Da quist fat profitan tant la Quotidiana sco eir la Posta Ladina, tuots duos cliaints da l'FMR. Quai es fich allegraivel! Il böt da la promozion da la lingua sta nempe i'l center. Quist böt as ragiundscha il meglder sur differents chanals, voul dir sur differentas gazettas, via radio, televisiun e vi e plü eir sur chanals online. Il plü important esa chi's riva pro las consumertas ed ils consumenti! La sfida in futur sarà vi e plü da chattar formats nouvs, sco per exaimpel podcasts, per ragiundscher eir ils giuvens e las giuvnas chi nu taidlan plü radio e nu legian plü gazettas.

Eu giavüsch a la "Posta Ladina" in che fuorma eir adüna bun success eir ils prossems 25 ons!

**Jon Domenic Parolini**, cusglier guverantiv, daspö il 2019 schef dal departamaint d'educaziun, cultura e protecziun da l'ambiaint. Dal 1996 fin dal 2014 president dal cussagl da fundaziun da l'ANR.